



**YIVONYISÜ EKHI ELAN ELI AZHA ,2005**  
**MÜCHAK 22 NZYU 2005.**

Department of  
Personal & Administrative Reforms  
Nagaland, Kohima.

# THE GAZETTE OF INDIA

Extraordinary  
Part II-Section I  
New Delhi, Tuesday, June 21, 2005  
Ministry of Law & Justice  
(Legislative Department).

Parliament Hoho na Azha shi methaki vataü tsükona Chesi choro tsüngon 15<sup>th</sup> nzyu 2005 lo meta Kipvülen na yingpvü nyimkata sekacho osi nzontsü ntsijanthokvü tsükona kako shi chiyithokcho.

## **YIVONYISÜ EKHI ELAN ELI AZHA, 2005** **MÜCHAK 22 NZYU 2005.**

Azha shina yivonyisü ekhivlo elan pi khito lia osi shi yakchia yanchü kyong na meta thosae thüngina yivonyisü khi zecheta hojitoli otsük akvüna satsüron na ntio elhi tsota yia vancho sana jiang etsüngcheta osi evonrhüa engae mekana yani khikhoka. Shi azha shi penphia elhi tsoa votav tsükona Longjüngi Yivonyisüekhi Lansoekho (Central Information Commission) tona State-i Yivonyisüekhi Lansoekho (State Information Commissions) to soyingcho.

Nzontsü chokalongshi satsüron (Democracy) meta jiang na yanchü kyong yakchia yivonyisü khi khito tsomomyümon jüa sataronta evamo jiang ji haphoe shyuchukchivü;

Yivonyisü khi khito yanche yivon jiang hapoe elachokchio shi yakchia sorikari sataronta lo tara khetsü chiyikhoka, elani nkümshon rheyilan tona mphoyi to jiang loha tara khetsü chiyikhoka; Hoji tsükona shina nzontsü lüm erüing ephanina shiang khetsü jiang ha nlansüngi senjümtalam;

Hoji tsükona yanchü kyong ochona yivonyisü khihünga sana azha shi küpona tsochomhon ji khikhoka .

Parliament hoho na India Republic yenjo Tinyantiroko to münyangchia khitao jilona yilan shiang chiyithoka methakcho;

## YILAN-1

### **Benkaden.**

1. (1) Shi Azha shiji Yivonyisü ekhiv lo elaneli Azha,2005  
(Right to Information Act 2005) to khivü.  
(2) Azha shiji Jammu tona Kashmir to state yaka jo India meta topvülo penphiv.  
(3) Azha Chiro 4 küpo chiroro (1) , Chiro 5 küpo chiroro (1) tona (2), Chiro 12,13,15,16,24,27 tona 28 to shiang jo azha methako jilona yenjoana penphiv elani Azha enhyolanchi elio jiang jo shi azha metsüksi tsüngon nzoasi myukhyu süloti penphiv.
2. Azha shiji shiang yakchia tsoa wov:-
  - (a) “Etümelan Sorikari “ shi yichak jo nzontsü kyong thüngi khyingtarata osi shentakota lia soyingi elio satsüron,okho osi otssiorang jiang tsolia Longjüng sorikari mekana Longjung Territory yansasa elani State sorikari tona pia evamo tvü tsov na lia.
  - (b). “Longjüngi Yivonyisüepi Lansoekho” (Central Information Commission) shi Okho shiji Azha Chiro 12 küpo chiroro (i) jilo epyankae soyingi väü.
  - ( c). “ Longjüngi Nzontsüthong Yivonyisüepi Tsüphoe “ (Central Public Information Officer) shiji Chiro (i) jilo epyankae ethüngchei väü elani Azha Chiro (5) küpo chiroro(2) jilona epyankae “Longjüngi Nzontsüthong Yivonyisüepi Jokyim Tsüphoe” (Central Assistant Public Information Officer) ha ethüngi väü.
  - (d). “Yivonyisüepi Vendan Lansoe ” (Chief Information Commission) tona Yivonyisüepi Lansoe (Information Commissioner) to shiang Azha Chiro 12 kupo chiroro (3) jilo epyankae ethüngi väü.
  - (e). “ Ntsoni Thosae” (Competent Authority) shiang esüa ha ethüngi väü;
    - (i). State tona Union tolo Assembly okho soyingi elio jiang jo Nsanpvüi tsoa evamo ji ethüngi väü;
    - (ii). Yitssophen Vendan (Supreme Court) lojo India Chief Justice ji ethüngü;
    - (iii). High Court lojo High Court Chief Justice ji ethüngi väü;
    - (iv). Constitution küpona okho thanpo soyingi elio jiang jo President tona Governor to tsov.
    - (v). Constitution Azha 239 küpona yansaron ha ethüngi väü;
  - (f). “Yivonyisü” to ephyo shiji shiang esüa lona yani khicheta ejyukaena kako erani licho,E-mails, ngatüngngari eze,yithenro kako, yizüng, logbooks, contracts, kakoro, models,data elani thanpo tsütsaelan kvüloshi nzontsü lüm erüng ephanina eyam ethev licho sana jiang tolona yani zecheta;
  - (g). “ Erantsüng” (Prescribed) to ephyo shijo Shikvü osi Azha sorikari na methaki elio ji , shi azha küpona yani ekhivlo etho pi lia;
  - (h) “Nzontsü kyong Etho” (Public authority) to ephyo shijo Soying mekana Okho kvüloshi (a). Constitution ,(b) Parliament, (c ) State Legislature elani (d) Shikvü osi Azha tsütsae yakchia lanchi yizüng pia soyingcho sana jiang lo etho picho;
    - (i). “ Sekae vacho” (Records) to ephyo jijo shiang esüa:-
      - (a). Erantsüngi vacho kako, Files tona Okhena erani vacho kako.

- (b). Kisü ekhae vacho, Rakaphen tsütsaelan.
- (c).Kisükhirhyu licho mekana Kisü chiyithoki licho.
- (d). Computer yakchia yanrhyu mekana khyarhyu licho.
- (j). “Yivonyisü ekhiv elaneli” (Right to Information) to ephyo jijo Azha shi küpona nzontsü kyong jiang thüngi etho pi elio ji; shiang esüa;
  - (i). Sekae licho, kakoro elani elhi tsoe elio jiang yani ezevlo etho;
  - (ii). Sekae licho kako khyarhyu, Cheka kako, kako eranrhyu licho to jiang yani eze to ;
  - (iii). Cheka kako lio jiang etsitae eze;
  - (iv). Diskettes, Floppies, Tapes, Video Cassettes elani Electronics thanpo Computer lo thechi elio jiang to yani eze.
- (k). “ State-i Yivonyisüekhi Lansoekho (State Information Commission ) to ephyo shijo azha Chiro 15 küpo chiro(i) shilona State Information Commission okho soyingi vao ji.
  - (l). “State-i Vendan Yivonyisüekhi Lansoe (State Chief Information Commissioner)” to phyoe elio ji yichak jo Azha Chiro 15 küpo chiroro (i) jilona State Chief Information Commissioner ethüngchei vanthokvü.
- (m) “State-i Nzontsüthong Yivonyisüekhi Tsüphoe( State Public Information Officer)” shiji Chiroro (i) shi küpona ethüngi vaü elani Chiro 5 küpo chiroro (2) shilo epyankae “State-i Nzontsüthong Yivonyisüekhi Tsüphoe Jokyim (State Assistant Public Information Officer )”to tsa ha ethüngchei vaü.
- (n) “Third Party” to tsa elio shijo yanchü kyong meko jiang na yivonyisü ekhiv tsükona jonji yilan thechiv, shilo nzontsü thosae ha jüa.

## YILAN-II

### **Yivonyisü ekhiv ephyoelan osi nzontsü etho lona elhingo.**

3. Azha methaki elio shi küpona yanchü kyong topvüna yivonyisü ekhiv etümelan pi lia.
4. (1). Azha shi küpona Etho tsütsae otsük akvü na shiang tsov na lia:-
  - (a).Kakolo sekao osi eranrhyui elio jiang merükmeria mekana etsüngcheta tvü tsov na lia, elani Computer lo thechi elio erantsüng jiang tsolia yuta ebenlo vacho nna meta mpümtolo shentacho tvü tsov shikvü.
  - (b). Azha shi benkae tsütsasi tsüngon nzoasi myukhu yutalo yithen yakchia soyingi elio okho shiji haphoe chiyithokvü na lia, soying jilo shiang jüa;
    - (i). Okho soying ji elhingo osi ejan elhilan jiang;
    - (ii).Shi Soying shilo Tsüphoe ndonkao osi jokyim tsoa elhi etsoe jiang etho;
    - (iii). Methak yilan jiang kvütoli methaki vataüsana tona ntio lanka yakchia ntsanrük penphia osi etsüngcheta elhi tsov sana jiang;
    - (iv). Elhingo jiang kvütoli tsütsäu sana jiang;
    - (v). Shikvü, Azha, etsyuchi yilan tona kvütoli soying shilo elhi etsoe jiang na elhilanmori tsov sana jiang;
    - (vi). Erantsüngi elio kakoro jiang kvütoli zeyata osi kenchüngi vaü sana jiang;
    - (vii).Azha shiji penphiv tsükona nzontsü kyong na jonjiyilan thechio jiang etsyuchi epiv lo nzanchia elhi tsoü;
    - (viii). Boards,Councils,Committes tona thanpo soying kvüloshi khanhyae

otsük eni mekana jina mhawoe soyingi lichu sana jiangna thyutasanta khisi methak yilan jiang kyong ntsijanthokvü loha nzanchi piv;  
 (ix) Tsüphoeden tona elhietsoe to jiang elhilanmoriphen okying;  
 (x) Methak ephanina tsüphoeden tona elhietsoeden to jiang chorotsen elani nzanchi otssirang to jiang ;  
 (xi)Otssiorang madang opvütsoa nnüng, ezizang madang elani hojilona khichei ethüngeziv jiang;  
 (xii)Lhinsüng jiang elhilanmori opvütsoa shi nnüng küpona otssiorang nzanchi epio jiang;  
 (xiii) Otssiorang nzanchi ehüng tona lanchi mekana etho pia elhi tsothoko jiang ethelaneli;  
 (xiv)Yivonyisü ekhio jiang chakcheta yanrhyui vaü elani hojiang electronic yakchia yanrhyuo jiang;  
 (xv)Yanchü kyong na Yivonyisü yanrhyuathüng tsochommhon hüngo jiang tona Yuta ezia kakoshüpi vani kako kha mekana eranrhyuo jiang;  
 (xvi)Public Information Officers jiang mying , elhi mying elani thanpo ethelan to jiang;  
 (xvii)Thanpolipo ethelan yivonyisü khiathüng yancheo jiang yuta topvülo zechoa vani nzyuakvü yithen chiyithoka evam to jiang;

- (c). Nnüng opvütsotso lanchi tsoathüng nzontsü kyong jiang thüngi emhokelüm lia evamo jiang yithen yakchia chiyithoki khatavü;
- (d). Yansasa thosae elani Yitsoedena etho tsütsata methak yilan methakathüng nzontsü kyong pono khetsü lio jiang;

(2). Methak yilan (b) küpo chiroro (i) shilo epyankae nzontsü kyong na etho tsütsata yuta akvülo Yivonyisü jiang ji yithenkiphen,internet yakchia yani ekhivü.

(3). Chiroro (i) jilona nzontsü kyong otsükakvü thüngi yivonyisü jiang jonga osi nzoa yani khito nzontsü kyong ntsijanthokvü lo elan pi lia.

(4). Tsütsaelan jiang yanrhyuathüng otssiorang kvütana ezicho sana elani ntio yisanlan nsana yantünyanricho sana elani ntio zen-okyak theta yantünyanricho sana elani lanka kvütowoena ntsithokna Longjüngi Nzontsüthong Yivonyisü epi Tsüphoe (Central Public Information Officers) mekana State Nzontsü thong Yivonyisü epi Tsüphoe (State Public Information Officers ) tona engathevü sana nna yancheo yilan jiang eranathüng oman laroena na eranchevü sana jiang ji mhona etsüngetsüvü .

**Erorocho**:- Chiroro (3) tona (4) tolo “ntsijanthoka” (disseminated) to erani elio ji yichak jo Notice Boards,Internet, Yithenro,Kisüzephen, elani lhishüpi thanpo yakchia etho tsütsata yivonyisü khi nzontsü kyong jiang ntsithoko ji .

5. (1). Nzontsü thosae mekana Satsüron topvüna shi Azha shi methaki vasi nchok 100 (nzoa) yutalo Longjüngi Nzontsüthong Yivonyisüepi Tsüphoe (Central Public Information Officers) mekana State Nzontsüthong Yivonyisüepi Tsüphoe (State Public Information Officers ) to ethüngchei elhi ndonkae vaü osi shi azha küpona kyong ochona yivonyisü khihünga sana tsüphoe shiang thüngina khikhoka.

(2). Ntia khetsü nlina Azha Chiroro (i) shi küpona Satsüron topvüna shi azha shi methaki penphisi tsüngon 100 (nzoa) yutalo Meta yangro (Sub-division tona Sub-district) tolo Longjüngi Nzontsüthong Yivonyisüepi Tsüphoe Jokyim(Central Assistant Public Information Officer) tona State-i Nzontsüthong Yivonyisüepi Tsüphoe Jokyim (State Assistant Public Information Officer) to ethüngchei vaü osi jonji yilan nzontsü kyong na erantechio jiang ji Chiro 19 küpo chiroro (i) jilo epyankae jonji kako jiang ji Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) to thüngi hanthokvü jisüi jo jonji kako jiang ji Longjüngi Yivonyisüepi Lansoekho (Central Information Commission) mekana State-i Yivonyisüepi Lansoekho (State Information Commission ) to thüngi hanthokvü:

Chiro 7 küpo chiroro (i) jilo epyankae khito Yivonyisü ekhivü tsükona Jonji yilan jiang Longjüngi Nzontsüthong Yivonyisüepi Tsüphoe Jokyim(Central Assistant Public Information Officer) tona State-i Nzontsüthong Yivonyisüepi Tsüphoe Jokyim (State Assistant Public Information Officer) thüngi thechivü osi hoji tsüngon jilona benkae yuta ji etsüngivü .

(3). Kyong ochona Yivonyisü khihünga sana jonji yilan Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) jiang thüngi thechivü osi shiang thüngina nzanchi khia yani khicheta.

(4). Satsüron tsüphoe ochona ombo elhingo ethelaneli tsükona yivonyisü khihünga sana ombona Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) thüngi jonji yilan thechi nzanchi khia yani zekhoka.

(5). Satsüron tsüphoe ochona azha Chiroro (4) küpona yivonyisü khihünga sana ombona Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) jiang nzo tsoe jokyimtae yantüngyanri zekhoka. Hoji yichak jo omboha Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) ejoena ombo khayiv .

**6.(1).**Kyong ochona azha shi küpona yivonyisü khihünga sana ombona/ompvüna erantsüngina mekana electronic theta Etsüiyina (English) mekana Hindi yina mekana hoji nkonjan jilo sorikarina ntio yisanlan chekayi licho sana hojivü yina erantsüngi oman ethevü elio jiang thei jonji yilan oküpoe pi elio shiang thüngi thechikhoka:-

(a).Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) jiang thüngi thechivü.

(b). Kyong ochona ombo/ ompvü elan tsükona yivonyisü khihünga sana Longjüngi Nzontsüthong Yivonyisüepi Tsüphoe Jokyim (Central Assistant Public Information Officer) mekana State-i Nzontsüthong Yivonyisüepi Tsüphoe Jokyim (State Assistant Public Information Officer) thüngina khicheta. Kyong ekhaeyan/eraneto nli tvüna Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) thüngi jonji kako n-nrancheo tvü tsoa tsona shiang na nzanchi pia ngatüngngari khito onte jonji kako jiang erani hanthokcheta.

(2). Kyong ochona jonji yilan thechia sana etüm jiang ji merüka erani piv shikvü elani yivon pijantaü tsükona ombona meta kvülo vana sana jiang ha merükmeria erani thechivü shikvü.

(3). Ochona nzontsü yilan tsükona yivonyisü ekhiv tsükona jonji yilan thechihünga sana shiang tsov na lia;

(a). Oyim tsükona etho tsütsacho.

(b). Nzontsü yilan tsoa sayia ombo kija tsükona ha shentacho tvü yilan tsov shikvü osi shi jonji kako ji zakto thanpoe thüngi lia tongphicheta. Shi elhilan ji nchok mongo yutalo tsocheta.

7.(1). Azha Chiro 5 küpo chiroro (2) elani Chiro 6 küpo chiroro (3) jilo lo elan pi elio shilo epyankae yivonyisü ekhiv jonjio yilan jiang Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) na Chiro (6) lo etho pi elio ji ephanina zakto elhi tsoe zeyivü. Jonji yilan kako tona oman (fees) to theta kako eranthechisi tsüngon thümro yutalo khichoyivü mekana n-nkhichoyiv to jiang ji Chiro 8 tona 9 to jilona epyankae elhi tsoyivü.

Kyong ochona eküm yi mekana tathi elan tsükona yivonyisü ekhivü tsükona jonji kako thechia sana shanlan züro tiza yutalo elhi tsoe zeyivü.

(2). Kvüthüng Longjüngi Nzontsüthong Yivonyisüepi Tsüphoe (Central Public Information Officers) mekana State Nzontsüthong Yivonyisüepi Tsüphoe (State Public Information Officers ) jiang na Chiroro (i) ephanina yuta pi elio jilo yivonyisü ekhivü tsükona jonji kako thechio ji ntia elhi ntsoyia sana hoji yichak jo jonji kako ji nkhichoyiala .

(3). Kvüthüng yivonyisü jiang oman thethoka li epivü methaka sana Longjüngi Nzontsüthong Yivonyisüepi Tsüphoe (Central Public Information Officers) mekana State Nzontsüthong Yivonyisüepi Tsüphoe (State Public Information Officers ) jiang na jonji kako thechio ji thüngi kako shiang theta erani hanthokvü:-

(a). Yivonyisü epivü oman jiang tanjünga etsüngetsüi ntsijanthokvü elani chiroro (i) ephanina oman jiang thele to ntsitayi piv osi shi yuta jijo tsüngon thümro yuta pi elio jilo n-ntsüngi.

(b). Ombo/ompvü elan tsükona methako jiang man thethokvü osi shiji zakto thethokvü.

(4). Shi azha küpona Longjüangi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) jiang na ethelan eli kako sekae elio jiang yani khithokvü elani thanpo ethelaneli jianglo tsolia nzanchia elhi tsov.

(5). Chiroro (6) lo methaki elio ji ephanina kyong ochona ejüpcho (printed) tona electronic format to shiang theta yivonyisü khihünga sana methak ephanina oman thethokvü. Oman jiang ji Chiro 6 küpo chiroro (i) tona Chiro 7 küpo chiroro (i) tona (5) jilo epyankae etümelan ephanina oman jiang khiyivü . Sorikari methak ephanina tsütsayantsae osi npen-nzi jiang jo oman shi nkhiyi.

(6). Kyong ochona chiroro (i) ephanina npham elhi tsoa sana Chiroro (5) jilo methaki elio ji ephanina yivonyisü jiang ji oman thethoksi yani khithokvü.

(7). Chiroro (i) küpona Longjüangi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) methak yilan ji nchiyithokthüng razü okho thanpoe jiang thüangi ntia phyochophyorü lilia na engae zevü.

(8). Kvüthüng chiroro (i) jilo epyankae phyochophyorü kako okho thanpoe jiangna thechia sana yivonyisü ekhivü tsükona kako thechio ji thüangi Longjüangi Nzontsüthong Yivonyisüepi Tsüphoe (Central Public Information Officers) mekana State Nzontsüthong Yivonyisüepi Tsüphoe (State Public Information Officers ) jiangna yiyenta kako shiang yilan jiang jüa eranlamü:-

- (i). Phyochophyorüo ji ndanphen ji.
- (ii). Elani jonji yilan thechivü tsükona yuta chümchak.
- (iii).Jonji kako thechio ji mying tona thanpo ethelan eli to jiang.

**8.** (1). Azha shilo erani liletoha yanchü kyong topvüna ombo/ompvü ejan elhi to hoe nkliche, shiang esüa:-

- (a). Yivonyisü ntsijantao shi yakchia India meta khüngta, ekyimphi nkoha, limha ozen-okyak, nkümshon, elani metapoe thüangi shentakota elio jiang lo nkhetsüo tvü tsoü shikvü.
- (b). Yivonyisü hapoe nchiyithokvü tsükona Shikvü osi Azha tsütsae jiang na khani elio jiang ji yikrachia vanthokvü.
- (c). Parliament Hoho jiha yikrachia yivonyisü jiang khiv.
- (d). Shishokhophi ejüeli, kikhonikyo osi thanpo eli to jiang haphoe ntsijanthoko ji yakchia okho ejoma na khetsü mekana ekhyu liv hoji tsükona yivonyisü jiang ji nkoha osi ndangshona khiv tsükona nzontsü ematha ephanina shi yilan tsükona jo thosae jiang khelo tsov.
- (e). Nchyua na nchyua longtsüka lia shentakota elio jilo ha nkoha tsükona yivonyisü ekhiv ji thosae na khiv.
- (f). Metapoe na mphoyi yio jiang ji yivonyisü ekhiv loha nkoha piv.



- (g). Yivonyisü hapoe chiyithoko ji yakchia kyong tsüka eküm lo ekhyu likhoka hoji tsükona shi yilan ji shikvü osi azha penphi elani ekyimphi na zeyav.
- (h). Nlan elio kyomo jiang rhümav osi yantünyanri elhilo yuta songa mekana sülamo jiang yivonyisü khiv.
- (i). Council of Ministers, Secretaries elani ntsoni tsüphoeden na thyutasi Cabinet na methak kako sekae elio jiang yivonyisü khiv. Council of Ministers na methako yilan jiang nzontsü thüangi ha ntsijanthokvü na lia. Methak yilan kvülo sana jo haphoe ntsijantao tvü ha lia.
- (j). Kyong nchyua ombo kija yilan haphoe ntsijantao ji yakchia nzontsü vanlanyilan lo khetsümori nlia tsona yilan jiang Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) elani Thosae na nzontsü ematha osi lümerüng ephanina yivonyisü khiv.

Yivonyisü khiathüng Parliament tona State Legislature tolo ntüm- nlammo yilan nlithokvü elan pi elio ji esüa kija ha elan pi lia.

(2). Official Secrets Act 1923 azha elani azha Chiroro (7) lo erani liletoha nzontsü kyong na yivonyisü jiang khicheta tolia hoji etümelan ephanina tae tsov shikvü.

(3). Azha methak chiroro (7) küpo (a), (c) tona (i) jilo epyankae nzyu myukyu yithakoe ntio tsocho sana jiang ji Chiro 6 lo erani elio ji ephanina jonji yilan thechi khito yivonyisü khikhoka. Shi yivonyisü khiathüng tsüngon osi yuta jiang ji merükmeria chekata ntsiv na lia, methak yilan mekana yidan ji Longjüng Sorikari na piv.

**9.** Yivonyisü ekhio ji yakchia etümelana mekana ntsa tsoa sekae elio jianglo wochoyiwotük likhoka, hoji tsükona Chiro 8 ji nkhet süna Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) na yivonyisü ekhiv jonji yilan thechio jiang ji nkichoyi.

**10** (1). Kvülo sana jo Yivonyisü ekhiv khani lia , azha shilo epyankae yivonyisü ekhiv jonji yilan thechio jiang ji nkichoyi. Kako sekae licho kvülo sana jo yani ezev tsükona lanchi lia hojiang jo etümelan ephanina yivonyisü jiang khicheta.

(2). Azha Chiroro (1) lo lona kako sekae elio jiang ji yani zev tsükona lanchi lia hoji tsükona Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) tona oküpoe erani elio shiang ephan jonji yilan thechio ji thüangi ntsijanthokvü;

- (a). Yivonyisü ekhivlo khalanchi nlio jiang tae yani khithokvü.
- (b). Tsütsaelan mekana kikyonyo yancho jiang ji etsüngetsüi zesi ntsa osi elan lona methakvü.
- (c). Methak yilan methakathüng omying osi elhi mying to jiang ji merükmeria erani chiyithokvü.

(d). Oman(fees) ethev elio jiang ji mhona etsüngetsüi jonji kako thechiathüng thethokvü.

(e). Azha chiro 19 küpo chiroro (1) lo ntsoni tsüphoe erani elio ji ephanina Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) jiang na jonji kako thechio ji elan elio jiang ji zecholaniv.

**11.** (1). Kvüthüng Azha shi küpona yivonyisü ekhivü tsükona jonji kako thechia sana Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) na yivonyisü ekhiv tsükona khani elio jiang oponi chiyithokhoka hoji tsükona ovüngthüng okho thanpo jiang thüngi mphoyena Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) na yiyenta kako eramvü, elani jonji kako thechisi nchok mongo yutalo okho thanpo jiang thüngi erantsüngina yiyenta kako eramvü hojisüi jo sekae mekana erantsüngi elio jiang ji oponi chiyithokvü elan eli nli engao osi janlan okho thanpo jiang thüngi ntsithoklamü hojisüi ti methak yilan methakvü.

Shikvü osi azha tsütsaeden na nkoha pia khalanchi elio jiang yaka jo nzontsü chokalongshi ephanina yivonyisü jiangji oponi chiyithokvü tolia shi yakchia okho thanpo jiang jo emhokelüm ntsothokvü tsükona ethelan eli jiang tsoyivü.

(2). Chiroro (2) küpona yivonyisü ekhivü kako erantechio jiang ji ntsijantaü tsükona Longjüngi Nzontsüthong Yivonyisüepi Tsüphoe (Central Public Information Officers) mekana State Nzontsüthong Yivonyisüepi Tsüphoe (State Public Information Officers ) na okho thanpo jiang na khirankhiri elinli yuta nchok taro vayia okho thanpo jiang thüngi engäu.

(3). Chiro (7) lo erani liletoha Longjüngi Nzontsüthong Yivonyisüepi Tsüphoe (Central Public Information Officers) mekana State-i Nzontsüthong Yivonyisüepi Tsüphoe (State Public Information Officers ) na Chiro (6) lo erani elio ji ephanina yivonyisü chiyithoka tsona ntia khirankhiri liliv sana to okho thanpo jiang thüngi nchok züro vayia engavü hojisüi jo chiroro (2) shi küpona kakolo sekae elio jiang ji yivonyisü ekhivü tsükona methak yilan ntsijantaü.

(4). Chiro (2) küpona okho thanpo jiang thüngi ntsijanta eramo jiang ji zeyivü osi elani Chiro 19 shi küpona methak yilan methako jiang ji zechoyivü tsükona jonji kako erantechivü tsochomhon piv.

### **YILAN –III**

#### **Longjüngi Yivonyisüekhi Lansoekho (Central Information Commission)**

**12.** (1). Longjüng Sorikari na Tsüphoe Yithen (Official Gazette) lo ntsijantao ji ephanina Longjüngi Yivonyisüekhi Lansoe (Central Information Commission) to tsa azha shi küpona soyingi etho pia elhılanmori jiang tsothokvü.

(2). Longjüngi Yivonyisüekhi Lansoekho (Central Information Commission) jiang ji shiang jüa soyingi vaü:-

(a). Vendan Yivonyisüekhi Lansoe (Chief Information Commissioner)

(b). Longjüngi Yivonyisüekhi Lansoe (Central Information Commissioner) otsük taro.

(3). Vendan Yivonyisüekhi Lansoe (Chief Information Commissioner) tona Yivonyisüekhi Lansoe (Information Commissioner) to shiang ji meta Kipvülen na yingpvü nyimkata ethüngchevü;

Ethüngchei okho jiang jo shiang:-

(i). Prime Minister jo Khokthepvüi ;

(ii). Lok Sabha lo Ekhiran Okho Esopvüi;

(iii). Union Cabinet Minister ejoma Prime Minister na ethüngchevü.

**Erorocho:-** Kvüthüng titotiri elio jiang zechotavü/khi sitavü tsükona yilan methakathüng House of the People jilo Ekhiran okho esopvüo jina nkichocho sana Sorikari okho lo House of the People Ekhiran Okho khoshao jilona elani ethüngchei Ekhiran Okho Esopvüi to chekayia ethüngchevü.

(4). Longjüngi Yivonyisüekhi Lansoekho ( Central Information Commission) lo nzontsü elhi sataronta ,Etsyuchi elani madangmari to jiang ji Vendan Yivonyisüekhi Lansoe (Chief Information Commissioner) ocho Yivonyisüepi Lansoe(Information Commissioner) na nzanchi pia elhi tsota vancho sana jiangna azha shi küpona thosae thanpo thüngi ntia etsyuchi nkхина elhi tsoa evöü onte pono etho lia .

(5). Vendan Yivonyisüekhi Lansoe (Chief Information Commissioner) tona Yivonyisüekhi Lansoe (Information Commissioner) to etsoü tsükona shiang esüa ethev lia, Kichok nchümüri nzoe, nzontsü vanlan yilan lo shentakota eli, Shikvü kako ntsinrang eli, ozen okyak thüngoe ntsinran, Yivonyisü ekhi thüngoe ekhae, madangmari eli , thosae elhi tsoa rothakcho, elani yansasa lo tsüphoe tsoa rothakcho sana to jiang.

(6). Vendan Yivonyisüekhi Lansoe (Chief Information Commissioner) tona Yivonyisüekhi Lansoe (Information Commissioner) ethüngcheo jiang ji Parliament lo khanhyae mekana State tona Union Territory tolo thongtsoeden tsoa evan ntsoü shikvü, elani sorikari elhi, phisayansa mekana shishokhophi tolo elhi etsoe ntsoü shikvü.

(7). Longjüngi Yivonyisüekhi Lansoekho (Central Information Commission) okying jijo Delhi yantsülo tsoü elani Longjüngi Yivonyisüekhi Lansoekho (Central Information Commission) shina Longjüng Sorikari thüngi lanchi khiali India meta thanpo jiang loha lhishüp (offices) chonchi vaü.

**13.** (1). Vendan Yivonyisüekhi Lansoe (Chief Information Commissioner) na elhilo rheyio tsüngon jilona benkae nzyu mongo yuta tsükona ethüngi tsothokvü osi ombo ji yenjo enioto jo elani nthüngche.

Elani omboji nzyu rokro mongo yakthakana lhishüp elhi lona esanthokvü.

(2). Yivonyisüekhi Lansoe (Information Commissioner) jiang ji elhilo rheyio tsüngon jilona benkae nzyu mongo yuta tsükona ethüngchei tsothokvü elani ombo nzyu rokro mongo npenthüng nandang tsoa vam osi ombo ji elani orhüm eni to jo Yivonyisüekhi Lansoe (Information Commissioner) elhi nthüngchelan.

Tolia ombona Yivonyisüekhi Lansoe (Information Commissioner) elhi lona esansi ombo ji etüma to tsoa tsona Chiro 12 küpo chiroro (3) jilo epyankae omboji Vendan Yivonyisüekhi Lansoe (Chief Information Commissioner) elhi etsoü tsükona ethüngchelan.

Kvüthüng Yivonyisüekhi Lansoe (Information Commissioner) ji elani Vendan Yivonyisüekhi Lansoe (Chief Information Commissioner) ethüngcheta sana elhi etsoü yuta ji nzyu mongo tsükona tae tsoü.

(3). Kvüthüng Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) ethüngcheta sana ombona lhishüp elhi nbenkathüng meta Kipvülen mhadongo echümchak khivü shikvü.

(4). Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) ochona omying esanhünga sana esan kako ombo khena erani thechiv shikvü.

Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) jiang ji Chiro 14 jilo epyankae elhilona chiyithokcheta.

(5). Jokheman (salary) tona thanpo oman epiv elani thanpo methak yilan jiang:-

(a). Vendan Yivonyisüekhi Lansoe (Chief Information Commissioner) chorotsen jijo Vendan Ethüngta Lansoe (Chief Election Commissioner) oni kheti tsov.

(b) Yivonyisüekhi Lansoe (Information Commissioner) chorotsen jiang jo Ethünga Lansoe (Election Commissioner) onte Kheti tsov.

Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) tsoa vamo jina India Sorikari küpo elhi tsoi esanthakcho (pension) tsoa tsona elani otsük-oso npenri nzanchi man khi tsoa vancho tsona ombona Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) elhi tsoji jokheman ji pension khi tsoa evamo jilo epyankae etsüngi zeyisi mataroethokvü.

Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) tsoa vamo jina Central Act mekana State Act elani Sorikari na nzanchia evamo Company nna Longjüng Sorikari na nzanchia evamo Soying to jianglo elhi tsoi esamo jiang tsolia ombona Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) elhi tsoji jokheman ji pension khi tsoa evamo jilo epyankae etsüngi zeyisi mataroethokvü.

Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) tsoa vamo jina India Sorikari küpo elhi tsoi esanthakcho (pension) tsoa tsona elani otsük-oso npenri nzanchi man khi tsoa vancho tsona ombona Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) elhi tsoji jokheman ji pension khia evamo jilo epyankae etsüngi zeyisi matarothokvü.

Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) tsoa vamo ji jokheman ji echüpota lia li lüm npük nlithokvü shikvü.

(6). Lonjüng Sorikarina Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) tsoa vamo jiang ji etüma tsona thanpo tsüphoe elhilan lia enghikata tsothokvü

azha shi lo jüa , kvüthüng hojito tsoa sana onte jokheman jiang ha azha shi küpona madangmariyivü.

**14.(1).**Kvüthüng Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) na etssoephyo nmhom osi ombo nstojanrüjan liana Chiroro (3) küpona meta Kipvülen na Yitssophen Ntsomo ( Supreme Court) thüngi nlan yani ezev tsükona ndongkavü osi yanche yivon ephanina Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) jiang ji ntio lanka lona elhilona esanthokvü sana jiang methakvü.

(2). Yantüngyanri elhilan jiang nthakthüng jo Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) jiang ji meta kipvülen na elhilo nvothokvü azha piv, kvüthüng yanche yivon ji hanjana sana meta kipvülen na chiroro (1) jilo epyankae yidan piv.

(3). Chiroro (1) jilo erani mpito liletoha meta kipvülen na Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) jiang ji shiang lo epyankae elhi lona esanthokvü;-

(a). Ochi-oma mekana shenkamoka elio jiang;

(b). Kyong vanlanyilan yeso jitvü nchümüri jüa to zecheo osi elhi nmhom etsoe jiang;

(c). Ombo elhi jilo ekaphata thanpo lhishüp lo jokheman khi tsoa elhi tsoa vamo jiang;

(d). Kichuknchümüri mekana otsükosolo nbenri lio jiang meta kipvülen na elhilo evoü elan nli to yidan pia esanthokvü;

(e). Ombona otssiorang mekana thanpo elhilo chokalongshi lio ji yakchia Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) elhi etsov lo khetsümore chiyio jiang.

(4). Kvüthüng Vendan Yivonyisüekhi Lansoe (Chief Information Commissioner) mekana Yivonyisüekhi Lansoe (Information Commissioner) na ombo ejan elhi ji sisi India sorikari mekana thanpo soying thüngi eman osi otssiorang ekhiv tsükona eranchak kako vata elhi tsoa mekana soying thanpolo khanyae tsoa sana chiroro (1) küpona omboji nlan etssoephyo tsothaka to ndamü.

#### **YILAN-IV**

##### **State-i Yivonyisüekhi Lansoeokho (State Information Commission)**

**15. (1).** Tsüphoe Yithen (Official Gazette) lo ntsijantao ji ephanina Sorikarina \_\_\_\_\_ (State mying) ji Yivonyisüekhi Lansoe to chekayia etho piv osi ombona shilo azha elio jiang tsütsta elhi jiang tsoa wov.

(2). State-i Yivonyisüekhi Lansoeokho (State Information Commission) jiang jo shiang;

( a). State-i Vendan Yivonyisüekhi Lansoe (State Chief Information Commissioner)

( b). Shilo ekaphata ethelan lia tsona khoshachona State-i Yivonyisüekhi Lansoe (State Information Commissioner) otsük taro ethüngü.

(3). State Vendan Yivonyisüekhi Lansoe (State Chief Information Commissioner) tona Yivonyisüekhi Lansoe (Information Commissioner) to shiang ji Governor na chekayia ethüngchevü; Ethüngchei okho jiang jo shiang esüa:-

- (i). Chief Minister jo Khokthepvüi;
- (ii). Legislative Assembly lo Ekhiran Okho Esopvüi;
- (iii). Cabinet Minister ejoma Chief Minister na ethüngchevü.

**Erorocho**:- Kvüthüng titotiri elio jiang khi sitavü methakathüng Legislative Assembly jilo Ekhiran okho esopvüo jina nkichoa sana Sorikari okho lo Legislative Assembly lo Ekhiran Okho khoshao jilona ethüngchei Ekhiran Okho Esopvüi to chekayiv.

(4). State-i Yivonyisüekhi Lansoekho ( State Information Commission) lo nzontsü sataronta ,Etsyuchi elani madangmari to jiang ji State-i Vendan Yivonyisüekhi Lansoe (State Chief Information Commissioner) ocho Yivonyisüepi Lansoe (Information Commissioner) na nzanchi pia elhi tsoa vancho sana jiangna azha shi küpona thosae thanpo thüngi ntia etsyuchi nkhina elhi tsoa evoü onte pono etho lia .

(5). State-i Vendan Yivonyisüekhi Lansoe (State Chief Information Commissioner) tona Yivonyisüekhi Lansoe (Information Commissioner) to etsovü tsükona shiang esüa ethev lia, Kichok nchümri nzoe, nzontsü vanlan yilan lo shentakota eli, Shikvü kako ntsinrang, ozen okyak thüngoe ntsinran, Yivonyisü ekhi thüngoe ekhae, madangmari eli , thosae elhi tsoa rothakcho, elani yansasa lo tsüphoe tsoa rothakcho to jiang.

(6). State Vendan Yivonyisüekhi Lansoe (State Chief Information Commissioner) tona Yivonyisüekhi Lansoe (Information Commissioner) ethüngcheo jiang ji Parliament lo khanhyae mekana State tona Union Territory tolo thongtsoeden ntsoü shikvü, elani sorikari elhi, phisayansa mekana shishokhophi tolo elhi ntsoe tsoü shikvü.

(7). State-i Yivonyisüekhi Lansoekho (State Information Commission) lhiüp okying jijo State Sorikarina tona State-i Yivonyisüekhi Lansoekho (State Information Commission) tona chekayio meta lo soyingvü.

**16.** (1).State-i Vendan Yivonyisüekhi Lansoe (State Chief Information Commissioner) na elhilo rheyio tsüngon jilona benkae nzyu mongo yuta tsükona ethüngi tsothokvü osi ombo ji yenjo enioto jo nthüngche. Elani ombo nzyu rokro mongo yakthakana lhisüep elhi lona esanthokvü.

(2). State-i Yivonyisüekhi Lansoe (State Information Commissioner) jiang ji elhilo rheyio tsüngon jilona benkae nzyu mongo yuta tsükona ethüngchei tsothokvü elani ombo nzyu rokro mongo npenthüng nandang tsoa vam osi ombo ji elani orhüm eni to jo State-i Yivonyisüekhi Lansoe (State Information Commissioner) elhi nthüngchelan.

Tolia ombona State-i Yivonyisüekhi Lansoe (State Information Commissioner) elhi lona esansi ombo ji etüma to tsoa tsona Chiro 15 küpo

chiroro (3) jilo epyankae omboji State-i Vendan Yivonyisüekhi Lansoe (State Chief Information Commissioner) elhi etsoü tsükona elani ethüngchelum.

Kvüthüng State-i Yivonyisüekhi Lansoe (State Information Commissioner) ji elani State-i Vendan Yivonyisüekhi Lansoe (State Chief Information Commissioner) ethüngcheta sana elhi etsoü yuta ji nzyu mongo tsükona tae tsoü.

(3). Kvüthüng State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) ethüngcheta sana ombona lhishüp elhi nbenkathüng State jilo Governor ji mhadongo echümchak khivü shikvü.

(4). State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) ochona omying esanhünga sana esan kako ombo khena erani thechiv shikvü.

State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) jiang ji Chiro 17 jilo epyankae ha elhilona chiyithokcheta.

(5). Jokheman (salary) tona thanpo oman epiv elani thanpo methak yilan jiang:-

(a). State-i Vendan Yivonyisüekhi Lansoe (State Chief Information Commissioner) jijo Ethüngta Lansoe ( Election Commissioner) oni kheti jokheman piv.

(b)State-i Yivonyisüekhi Lansoe (State Information Commissioner) jiang jo State Sorikari küpo Vendan Eranpvüi (Chief Secretary) tsoa evamo jokheman ji esüa tsov.

State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) tsoa vamo jina India Sorikari mekana State sorikari küpo elhi tsosi esanthakcho (pension) man khi tsoa vana tsona elani otsük-oso npenri nzanchi man khi tsoa vancho tsona ombona State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) elhi tsoji jokheman ji pension khia evamo jilo epyankae etsüngi zeyisi mataroethokvü.

State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) tsoa vamo jina Central Act mekana State Act elani Sorikari na nzanchia evamo Company nna Longjüng Sorikari mekana State Sorikari tona nzanchia evamo Soying to jianglo elhi tsosi esancho man tsoa vancho tsona ombona State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) elhi tsoji jokheman ji pension khia evamo jilo epyankae etsüngi zeyisi mataroethokvü.

State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) elhi ndonkasi sülo jokheman ji echümpota lia li lüm npük nlithokvü shikvü.

(6). State Sorikarina State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) tsoa vamo jiang ji etüma tsona thanpo tsüphoe elhilar lia enghikata tsothokvü azha shi lo jüa , kvüthüng hojito tsoa sana onte jokheman jiang ha azha shi küpona madangmariyivü.

17 (1). Kvüthüng State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) na etssoephyo nmhom osi ombo nstojanrüjan lia sana Chiroro (3) küpona State jilo Governor na Yitssophen Ntsomo ( Supreme Court) thüngi nlan yani ezev tsükona elhi ndongkavü osi yanche yivon ephanina State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) jiang ji ntio lanka lo epyankae elhilona esanthokvü sana jiang methakvü.

(2). Yantüngyanri elhilar jiang nthakthüng nangdang jo State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) jiang ji State jilo Governor na elhilo nvothokvü azha piv, kvüthüng yanche yivon ji hanjana sana state jilo Governor na chiroro (1) jilo epyankae elhilona esanthok yidan piv.

(3). Chiroro (1) jilo erani mpito liletoha State Governor na State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) jiang ji shiang lo epyankae elhi lona esanthokvü;-

(a). Ochi-oma mekana shenkamoka elio jiang;

(b). Kyong vanlanyilan yeso nchümüri jüa to zecheo osi elhi nmhom etsoe jiang;

(c). Ombo elhi jilo ekaphata thanpo lhisüp lo jokheman khi tsoa elhi tsoa vamo jiang;

(d). Kichuknchümüri mekana otsükosolo nbenri lio jiang State Governor na elhilo evoü elan nli to yidan pia esanthokvü;

(e). Ombona otssiorang mekana thanpo elhilo chokalongshi lio ji yakchia State-i Vendan Yivonyisüekhi Lansoe(State Chief Information Commissioner) mekana State-i Yivonyisüekhi Lansoe (State Information Commissioner) elhi etsov lo khetsümüri chiyo jiang.

(4).Kvüthüng State-i Vendan Yivonyisüekhi Lansoe (State Chief Information Commissioner) mekana State-i Yivonyisüekhi Lansoe (State Information Commissioner) na ombo ejan elhi ji ephaolo India sorikari mekana thanpo soying thüngi eman osi otssiorang ekhiv tsükona eranchak kako vata elhi tsoa mekana soying thanpolo khanyae tsoa sana chiroro (1) küpona omboji nlan etsoephyo tsothaka to ndamü.

#### **YILAN –V**

#### **Yivonyisüekhi Lansoeokho Etho osi ejan elhi tona Jonji elani Echato.**

18. (1). Shi azha shilo epyankae yanchü kyong na jonji yilan osi yani ezev kako thechio jiang ji Lonjüngi Yivonyisüekhi Lansoeokho (Central Information



Commission) mekana State-i Yivonyisüekhi Lansoe (State Information Commission) na oküpoe erani elio shiang lona zeyiv;

(a). Shi azha küpona Longjüngi Nzontsüthong Yivonyisüekhi Tsüphoe Jokyim (Central Assistant Public Information Officer ) mekana State-i Nzontsüthong Yivonyisüekhi Tsüphoe Jokyim (State Assistant Public Information Officer ) to soyingi nlichho jianglo nzontsü kyong na jonji yilan thechio jiang ji Longjüngi Nzontsüthong Yivonyisüekhi Tsüphoe ( Central Public Information Officer) mekana State-i Nzontsüthong Yivonyisüekhi Tsüphoe (State Public Information Officer) jiang na khichooü mekana nkichooü tsükona elani jonji kako jiang ji Azha chiro 19 küpo Chiroro (1) jilo epyankae Longjüngi Yivonyisüekhiokho thüngi hanjaniv.

(b). Ethelan eli oman (fee) theo jiang ji khichoyiv;

(c). Shi azha shi penphiathüng nlan mekana kyong sosorao yivonyisü to zecheo jiang ji etsüngchoyiv;

(d). Shi azha küpona sekae elio jiangji jonji kako thechio ji ephan yantüngyanriyiv.

(2). Kvüthüng yanche yivon pio jiang ji yantüngyanri ezev ethev lia to zecheta sana Longjüng Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission ) na yancholaniv.

(3). Kvüthüng Longjüng Yivonyisüekhi Lansoekho (Central Information Commission ) mekana State-i Yivonyisüekhi Lansoekho (State Information Commission ) na chiro shi küpona yanche yivon jiang yancholana sana Code of Civil Procedure 1908 azha küpona Yitssophenlo etho pi elio jiang esüa tsütsäu, shiang esüa;

(a). Jonji yilan thechio ji yitssopheni tsäu osi ombo ji erantsüngina tsolia mekana opüngna tsolia ecümjakthoka mekana ehüngpvüi kako hansi eyiv tolo nongtaka ezov.

(b). Ethelan eli kako yancheo jiang mhona etsüngetsüi mekana yantüngyanriv.

(c). Echümjak kako jiang khichoyiv.

(d). Yitssophen thanpoena nzontsü kako sekae mekana erani elio jiang choni ekhiv.

(e). Ehüngpvüi kako jiang mhona etsüngetsüi ezev mekana choni khiyiv.

(f). Thanpo ethelan etssyukae elio jianglo to

(4). Parliament of State Legislative lo Azha thanpo njüo jiang Longjüngi Yivonyisüepi Lansoekho (Central Information Commission) mekana State-i Yivonyisüepi Lansoekho (State Information Commission) na shi azha küpona kako sekae elio jiang ji yantüngyanriv mekana shyu khiv elani nzontsü thosae khelo elio jiang tsolia yantüngyanri khiv.

**19.(1)** Jonji kako thechisi yuta züngchaki elio jilo ntia methak yilan nhünga tsona elani methak yilan methako jiang yakchia ombo lüm npük elani nmathao tvü tsoa tsona Azha chiro (7) küpo chiroro (3) (a) mekana chiroro (1) ephanina Longjüngi Nzontsüthong Yivonyisüekhi Tsüphoe (Central Public Information Officer) mekana State-i Nzontsüthong Yivonyisüekhi Tsüphoe ( State Public Information Officer) pomoe thosae evamo jiang thüngi tsüngon thümro yutalo elani methak kako ji hüngsi sülo elani zechoelaniv tsükona jonji kako thechikhoka.

- (2).Kvüthüng Longjüngi Nzontsü Yivonyisüekhi Tsüphoe (Central Public Information Officer) mekana State-i Nzontsüthong Yivonyisüekhi Tsüphoe ( State Public Information Officer) na yidan methako jiang ekhiraana kako erana sana Chiro 11 küpona okho thanpo jiang thüngi tsüngon thümro yuatalo yivonyisü jiang ji haphoe chiyithokvü jonjiv shikvü.
- (3).Chiroro (1) jilo epyankae yenjo enioto jonji yilan thechiv osi yivonyisü jiang ji tsüngon ekhatokvü yutalo Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) na methaki ntsitaü;
- (4).Kvüthüng Longjüngi Nzontsü Yivonyisüekhi Tsüphoe (Central Public Information Officer) mekana State-i Nzontsü Yivonyisüekhi Tsphoe ( State Public Information Officer) na methak yilan methako ji jonji yilan thechio jina tümkae thechio ji ephan mekana okho thanpo thüngi yivonyisü khia sana Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) na etümelan ephanina ntsi ekhiv tsükona okho thanpo jiang thüngi yivonyisü khilamü.
- (5). Jonji yilan yantüngyanri methako ji etümelana mekana ntsa to ji Longjüngi Nzontsü Yivonyisüekhi Tsüphoe (Central Public Information Officer) mekana State-i Nzontsü Yivonyisüekhi Tsüphoe (State Public Information Officer) jiang na tanchakvü.
- (6). Azha chiroro (1) tona (2) to jilo epyankae jonji kako thechio jiang ji nchok thümro yutalo methakmesüi ntsijantaü osi yuta ji erantüing eranrivü mekana sekae vaü tsükona yuta senchilaniv etheü lia tsona elani tsüngon züro mongo senchilamü.
- (7).Metahk yilan jiang ji Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) na okhao tsoa tanchaka methakvü.
- (8). Methak yilan jiang ji Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) jiang na oküpoe etho pi elio shiang lona tsütsata methakvü;
- (a).Azha shi küpona nzontsü kyong thosae thüngi nzanchi khia elhi shiang tsoü;
- (i). Yivonyisü jiang ji jonjio jia ephan yani zeyiv.
- (ii). Longjüngi Nzontsüthong Yivonyisüekhi Tsüphoe (Central Public Information Officer) mekana State-i Nzontsüthong Yivonyisüekhi Tsüphoe (State Public Information Officer) ethüngi vanthokvü.
- (iii).Yivonyisü mekana ethelan ntsijanta yilan jiang ji yithen yakchia ntsijantaü.
- (iv). Sekae elio kako roe elio jiang tona hojiang tsütsa lanka to jiang tolo zechozeriv.
- (v). Yivonyisü ekhivlo elan eli to ji tsüphoe jiang mmhona engathethei elhi tsotaü tsükona thangshi khithokvü.
- (vi).Chiro 4 küpo Chiroro (1),(b) jilo epyankae nzyu ochümi yivon chiyithokvü.
- (b). Jonji kako thechio jina epüb osi ezüb hüngo jiang ji nzontsü thosae jiang khi nzanchi pithokvü.

- (c). Azha shi küpona echa ha khiyivü.  
(d). Jonji kako thechio jiang ji nkichoyi.  
(9). Methak yilan jiang ji Longjüangi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) na ntsijanta kako chiyithokvü.  
(10). Azha methaki elio ji ephanina Longjüangi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) jiang na ndongkae elio etho jilona okhao to yidan methakvü.

**20.** (1). Yanchü kyongna yivonyisü ekhiv jonji kako thechio jiang ji Longjüangi Nzontsüthong Yivonyisüepi Tsüphoe(Central Public Information Officer) mekana State-i Nzontsüthong Yivonyisüepi Tsüphoe(State Public Information Officer) jiang na ntia lanka nliv nkichoyia mekana Chiro 7 küpo chiroro (1) azha ji nkhanziv yivonyisü jiang ji etümelan lona mekana ntsojan jüa pia sana mekana yivonyisü jiang ji yuta sülana ha npia sana Longjüangi Yivonyisüepi Lansoekho (Central Information Commission) mekana State-i Yivonyisüepi Lansoekho (State Information Commission) na methaki elio ji ephanina engalo rangpyak nzo enisi tinyan echa etsüangi khiyiv osi shiji rangpyak othüing myukyu mongo nyakthokvü shikvü.

Echa shiji khiyivü yidan npithüing ncümcholani mekana etsüingchoe ezev tsükona State-i Nzontsüthong Yivonyisüepi Tsüphoe (State Public Information Officer) jiang thüangi yuta züngchaki vayiv.

(2). ). Kvüthüing Longjüangi Nzontsüthong Yivonyisüepi Tsüphoe(Central Public Information Officer) mekana State-i Nzontsüthong Yivonyisüepi Tsüphoe(State Public Information Officer) jiang na ntia lanka nliv jonji kako thechio jiang ji nkichoyia mekana etanana Chiro 7 küpo chiroro (1) azha ji nkhanzia yivonyisü jiang ji etümelan lona mekana ntsojan jüa pia sana mekana yivonyisü jiang ji yuta sülana ha npia sana State-i Nzontsüthong Yivonyisüepi Lansoekho (State Public Information Commissioner) na yidan methaki elio ji ephanina nzonga man Longjüangi Nzontsüthong Yivonyisüepi Tsüphoe(Central Public Information Officer) mekana State-i Nzontsüthong Yivonyisüepi Tsüphoe(State Public Information Officer) jiang ji ezüb piv.

## **YILAN VI**

### **Ekapharo (Miscellaneous)**

- 21.** Elhi mmhona etsoe longtsükaro kyong jiang ji azha mekana methak shilona ezüb osi ntsongshi elani khentsoyitso ntsoe.  
**22.** Official Secret Act,1923 elani shikvü azha methaki liletoha shi azha küpona topvü ji tachia elhi tsovü.  
**23.** Shi azha shina methaki vao ji yitssopenina oyi tsoe nzeche elani ochinaha ngatüingngari nzeche,ndonsina yivonyisü kühünga tsona jonji kako thechi ngatüingngari zekhoka.  
**24.** (1). Longjüang sorikari na soyingi evao Chephyim cheri elani ekyimphi to jiang pono jo shi azha shina nyanche to Second Schedule lona methakcho.  
Tolia tsomonyümon elani okho vanyilan lo nrao elhilan tsoe elio jinag jo yani zekhoka.

Ochona yivonyisü khihünga sana ovünghüng Longjüngi Yivonyisüekhi Lansoe (Central Information Commission) thüngina lanchi kako khisanati tsoü Chiro 7 lo phyoe elio jiang jo jonji kako thechisi tsüngon züro mongo yutalo yivonyisü jiang ntsijanthokvü shikvü.

(2). Sorikari na soyingi evao Chephyimcheri elani ekyimphi to jiang thüngi yani ezevü tsükona schedule lona khani elio jiang ji zecholani vakhoka tolia hojiang ji Longjüng sorikari na ntsijanta yidan Tsüphoe yithenro (Official Gazette) yakchia yivon chiyithokvü shikvü. Schedule shilo ekhyimphaü elani khi esivü to jiang ji ntsijanta yidan pithaka na hoji ephan tsov.

(3). Chiroro (2) lo erani elio ji ephanina Ntsijanta yidan jiang ji House of Parliament lona lümna rünga khichoyi vaü.

(4). Chephyimcheri elani ekyimphi to okho state sorikari na soyingi elio jiang tsükona azha methaki nlio jiang ji shi azha küpona sorikarina methaki yidan Tsüphoe yithen (Official Gazette) yakchia ntsijantae tsütsakhoka. Tolia shiang ephan tsov shikvü;

Tssomonyümon osi kyong nchyua elan eli to jiang tsükona yivonyisü ekhiv jo shi azha küpona ntsoche.

Kyong nchyua elan pi elio ji nkhangsamü elhilanmori tsoe licho jiang yivonyisü khihünga tsona ovngthüng State-i Yovonyisüekhi Lansoekho (State Information Commission) thüngina lanchi kako hanshi yichev. Azha Chiro 7 jilona phyoe eli jilona yivonyisü ekhiv jonji kako thechisi nchok züromongo yutalo yivonyisü jiang khithokvü na lia.

(5). Azha chororo (4) shi küpona yidan methakvü ji topvü State Legislature yakchia tsov.

**25.** (1) Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) na nzyu ochümi yivon jiang methaki vaü osi hoji kako ji Sorikari thüngi ha piv.

(2). Satsüron mekana Ministry topvüna nzontsü thosae etho onte yansasa küpo elio jiang ji khyarhyui mekana yannrhyu yivonyisü jiang Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) thüngi yivon piv osi shi azha küpona sekaoyancheo jiang ji mmhona methaki jüngkümi mekana kenchüngi vaü.

(3). Yivon jiang ntio nzyu tsükona pia sana jiang mmhona merüka sekae vaü shiang esüa;

(a). Nzontsü thosae na jonji kako kvütata pichosana jiang;

(b). Jonji kako thechio jiang kvütata nbencheyichecho sana mekana azha shi küpona jonji kako thechio jiang kvütata bencheyicho sana jiang;

(c). Jonji kako thechio jiang kvütata Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) thüngi zechozerivü tsükona hanthokcho sana elani ntio jonji yilan nna ntio tsocho sana jiang ji shilona zeü;

(d). Tsüphoe ocho shi azha küpona oyi tsoyicho sana;

(e). Azha shi küpona nzontsü thosaena echa kvütata khiyicho sana jiang;

(f). Nzontsü thosaena azha shi tsütsaü tsükona ntio yansasa theta elhi tsocho sana jiang;

(g). Azha shi mmhonkathokvü opvü tsoa nzontsü thosae etho tsütsalo shiang esüa tsükaranka, meta mmhonkathok elani azha zechozeri tona Shikvü azha

tsütsalanka elani yivonyisüekhilo elan eli tsütsa tona thanpo yivonyisü ekhivlo to;

(4). Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) na nzyu ochümi yivon hanthoko jiang Longjüng Sorikari tona State Sorikari na chiroro (1) lo phyoe elio ji ephanina Parliament House lo mekana State Legislature thüngi hanthokvü .

(5). Azha shi küpona Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) na thosae jiang khüpthechia elhilanmori ntsoche tolia onte etsyuchi ephanina motsüngtsüng na tsoa voü.

**26.** (1). Sorikarina otssiorang jiang ji tsochobenche ephanina rheyilan osi chiyilan shiang esüa tsov;

(a). Yivonyisü ekhiv elan elio shiji kvütowoena tsütsäu sana jiang ji mmhona nzontsü kyong jiang engathethokvü osi ntsijanthokvü tsükona tsükaranka elani ekhaeyan lo thechi khatav tsükona hapihasi;

(b). Methak (a) lo nnüng phyoe elio jiang ji tsütsatavü tsükona lümtsonkae elhilan osi tsükaranka etsov lo thosae na nzanchiv;

(c ). Yivonyisü ekhi elhilan jiang ji nzontsü thosaena ntsijantaü osi yuta ebenlo elhilan jiang tsov;

(d). Nzontsü thosaena Longjüngi Nzontsü Yivonyisüepi Tsüphoe (Central Public Information Officer) mekana State-i Nzontsü Yivonyisüepi Tsüphoe (State Public Information Officer) jiang ji thangshi piv. Ntio tsakasüka osi eraneto theta thangshi picho sana jiang ji ejüvü.

(2).Azha shi benkae penphisi choro tarotiza yutalo sorikarina chekayio yisanlan lona yivonyisü jiang kvütoli etsyuchi pia khithokvü sana jiang methakvü hojitoli yivonyisü ekhiv tsükona elan eli jiang ji laroe na kyong jiang thüngi engathethokvü.

(3). Azha chiroro (2) jilo phyoe elio jiang ji Sorikarina kvüthüng tsoa sana yithen lo chiyithokvü osi shi yakchia nzontsü kyong ochia ntachio tsoa penphiv. Shiang esüa;

(a). Azha ji etümezi;

(b). Chiro 5 küpo chiroro (1) lona Longjüngi Nzontsüthong Yivonyisüepi Tsüphoe (Central Public Information Officer) mekana State-i Nzontsüthong Yivonyisüepi Tsüphoe (State Public Information Officer) ethan ethüngchecho yakchia Postal tona Stree Address , Phone tona Fax Number elani thanpo Electronic Mail Address to tongphio jiang ji ntsijantavü;

(c ).Longjüngi Nzontsüthong Yivonyisüepi Tsüphoe (Central Public Information Officer) mekana State-i Nzontsüthong Yivonyisüepi Tsüphoe (State Public Information Officer) jiang thüngi yivonyisü jiang kvütowoe na jonjia eram sana jiang;

(d). Shi azha küpona nzontsü thosae na Longjüngi Nzontsüthong Yivonyisüepi Tsüphoe (Central Public Information Officer) mekana State-i Nzontsüthong Yivonyisüepi Tsüphoe (State Public Information Officer) thüngi ntio nzanchi khiv sana jiang;

(e). Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) thüngi na ntio nzanchi khiv sana jiang;

- (f). Shikvü osi azha lo ntsojanzüjan jiang zechov osi shi azha küpona kvütoli Lansoekho (Commission) jiang thüngi jonji yilan thechiv sana jiang;
- (g). Chiro 4 küpona sekae mekana erani elio jiang ji lümerüng ephanina oponi chiyithokvü jiang;
- (h). Yivonyisü ekhiv man jiang ntsijanthokvü;
- (i). Azha shi küpona methaksüthak thanpo jiang ha ntsijantavü;
- (j). Sorikarina etsyuchi jiang ji yuta akvülo yithen yakchia ntsijantavü.

**27.**(1). Azha shi küpona methako yilan jiang ji Tsüphoe Yithenkako (Official Gazette) yakchia ntsijantavü.

(2). Echümporo tsoa ochia ntachina shikvü methako jiang ji ntsijantaü, shiang esüa;

(a). Azha Chiro 4 küpo chiroro (4) elio jilona ntsijantav phyoe elio ji ephanina kako laroena ejüpo jiang ji ntsijantaü;

(b). Azha Chiro 6 Küpo chiroro (1) ephanina oman jiang ethev ji;

(c). Azha chiro 7 küpo chiroro (1) tona (5) jilo oman jiang ethev ji;

(d). Azha Chiro 13 küpo chiroro (6) tona Chiro 16 küpo chiroro (6) to jilo phyoe elio ji esüa Tsüphoeden tona hojilo elhi etsoeden to chorotsen tona thanpo ethelan eli to jiang ji piv;

(e) Azha Chiro 19 küpo chiroro (10) lo phyoe elio ji esüa jonji kako jiang ji Longjüngi Yivonyisüekhi Lansoekho (Central Information Commission) mekana State-i Yivonyisüekhi Lansoekho (State Information Commission) na metsükmesüvü;

(f). Thanpo ethelan eli jiang ha shilona metsükmesüvü;

**28.** (1). Azha shi methakvü tsükona Tsüphoe Yithenkako (Official Gazette) yakchia etho pi elio tsüphoeden jiang na ntsijantaü.

(2). Echümporo tsoa ochia ntachina shikvü methako jiang ji ntsijantaü, shiang esüa;

(i). Azha Chiro 4 küpo chiroro (4) elio jilona ntsijantav phyoe elio ji ephanina kako laroena ejüpo jiang ji ntsijantaü;

(ii). Azha Chiro 6 Küpo chiroro (1) ephanina oman jiang ethev ji;

(iii). Azha chiro 7 küpo chiroro (1) ephanina oman jiang ethev ji;

(iv). Thanpo ethelan eli shilo njüo jiang ji metsükmesüvü.

**29.** (1). Lonjüng Sorikari na azha methako jiangji Parliament House thüngi hanthokvü osi hojilona thyutasantasi nchok thümro sülo Parliament House enihata lona lümna rüngali zechozeriv osi shi zecho zeriathüng ochia ntachina tsovna lia, jisüi jo shikvü osi azha jiang methakvü.

(2). Shikvü osi azha methako jiang ji State Sorikarina State Legislature thüngi ntsijanthokvü.

**30.**(1). Lonjüng Sorikari (Central Government) na Tsüphoe Yithenkako (Official Gazette) lo thei khatasi sülo phyochophyörü osi lüm npük yilan chiyia tsona azha ji khi sicheta tolia hoji azha benkasi nzyu eni yutalo tsov na lia.

(2). Yidan methako jiang ji zakto Parliament House lo thechiv na lia.

**31.** Nzyu 2002 lo Yivonyisü ekhiv tsükona etho pi elio ji ekhilanala.

## The First Schedule

Vendan Yivonyisüekhi Lansoe (The Chief Information Commissioner)/ Yivonyisüekhi Lansoe (The Information Commissioner)/ State-i Vendan Yivonyisüekhi Lansoe (The State Chief Information Commissioner) tona State-i Yivonyisüekhi Lansoe (The State Information Commissioner) tsükona echümchak ji shi esüa khiv.

“ A \_\_\_\_\_ ji Vendan Yivonyisüekhi Lansoe (The Chief Information Commissioner)/ Yivonyisüekhi Lansoe (The Information Commissioner)/ State-i Vendan Yivonyisüekhi Lansoe (The State Chief Information Commissioner) tona State-i Yivonyisüekhi Lansoe (The State Information Commissioner) etsovü a ethüngcheo ji tsükona a longtsü osi ntsanrük lona Potsow mhadongona shi echümchakala ana \_\_\_\_\_ shiji \_\_\_\_\_ India Constitution lo shikvü osi azha methaki elio ji ephanina India meta mmhonka osi ekhüng methak ephanina a kichok nchümüri , ntsanrük osi a ntsinrang jiang topvü theta elhi a ndongkao jiang tsoa wovü “